

王
氏
醫
案

才不足以包乎所業之外則其業不精心不足以周乎所業之中則其業亦不精羿之射條之丸張旭之草書蘭子之舞劍其人皆負不可一世之才而俯首降心於一藝之微研窮玩索不能自己迨其業之旣成而天下莫能尙况乎醫之爲道參天人之奧操性命之權其理至深其責至重而世顧以無才無識之人挾不專不精之術貿貿施治絕人長年宜乎古人有學醫人費之慨也余自束髮受書篤嗜軒岐之學以家貧無力致書所蓄者靈素而外立齋景岳諸種而已觀其援引之繁富議論之辨博竊以爲道在於是而按法施治輒爲所困嗣得西昌喻氏

之書伏而誦之始有以識夫病情之蕃變方劑之準繩與夫寒暑陰陽之變化其才大而學博識高而法密有非薛張諸公所
能髣髴者然而尙論一編猶襲三綱之謬春溫一論混入傷寒
之中白璧微瑕不能不爲此老惜也歲在乙巳服官江右廣搜
百氏之書如葉天士之高超尤在涇之切實王晉三之精奧張
路玉之明達以及吳又可徐洄溪柯韻柏陳修園諸君子罔弗
各具精心獨抒偉論靈蘭之祕闡發靡遺然而宗古訓者矩矱
弗失而不免於附會穿鑿崇妙悟者化裁生心而或涉於支離
背謬夫醫主於愈病而已偏執一途而故持高論縱名理湛深

與病情無與也偶於坊間得武林王君孟英所著霍亂論一帙其理明其詞達指陳病機判然若黑白之不可混淆以爲飼餵山人之流亞私心竊嚮往之己酉冬余室人患痰飲脇痛屢藥弗痊漸卽沈困適孟英來撫之金幣視吳侯醞香之疾亟走伻相邀惴惴然恐不得一當乃孟英惠然肯來投藥五劑而大效並出初刊醫案回春錄見示因縱談古今之同異百家之得失滔滔滾滾折衷悉當始知霍亂一論不過孟英一端之緒餘而又竊幸余向之私心傾慕者爲不誣也詢其近案積有數卷乃張柳吟趙菊齋諸君子所輯定而題其篇曰仁術志余取而讀

之喜其崇論閎議足爲世法因易其名曰王氏醫案與回春錄
合爲一編而附霍亂論於後并謬加評點付諸攻木之工以廣
其傳蓋醫者生人之術也醫而無術則不足以生人醫而悞用
其術則不惟不足以生人而其弊反至於殺人夫醫雖至庸未
有忍於殺人者也而才不足以應紛紜之變學不足以窮古今
之宜識不足以定真僞之幻則其術不精斯曰殺人而不自知
故爲醫而無才無學無識不可也爲醫而恃才恃學恃識亦不
可也必也平心以察之虚心以應之庶乎其可也夫古人因病
而生法因法而成方理勢自然本非神妙唯用之而當斯神妙

矣今才如孟英學如孟英識力精超如孟英而每臨一證息心
靜氣曲證旁參務有以究乎病情之真而後已宜乎出奇制勝
變化無方著之醫案卓卓可傳如是也余讀孟英之書於數年
以前以爲迢迢二千里山遙水阻必無相見之期乃吳君病而
孟英來孟英來而余室適病宛轉牽引卒使數年來望風相思
之友把袂盤桓傾吐肝鬲極苦岑遇合之奇夙世因緣諒非淺
鮮孟英勉乎哉異日者擷眾籍之精華訂羣言之謬僞刪繁提
要勒爲一書以保全天下萬世之民命厥功甚鉅而爲力亦甚
艱天末故人所企望於良友者詎止斯醫案一編而已耶

道光三十年歲次庚戌知宜黃縣事楊照葵書於吟香書屋

予友王君孟英少年失怙其尊人彌留之際執孟英手而囑曰
人生天地之間必期有用於世汝識斯言吾無憾矣孟英泣拜
而銘諸心版然自顧家貧性介不能爲利達之人將何以爲世
用耶聞先哲有不爲良相則爲良醫之語因自顏其室曰潛齋
而銳志於軒岐之學潛心研究遂挾其微年未冠遊長山卽納
交於予每見其治病之奇若有天授而視疾之暇恒手一編不
輟也繼瞻其齋頭一聯云讀書明理好學虛心可見苦志力學
蘊之胷中者淵深莫測乃能窮理盡性出之指下者神妙難言
二十年來活人無算豈非以用世之才運其濟世之術而可垂

諸後世者哉今就予耳目所及之妙法仿丁長孺刻仲淳案之
例錄而付梓名曰回春錄見聞有限遺美極多世之君子必有
如莊斂之華岫雲其人者更爲之遠搜博采以廣其傳而予糠
秕在前有榮施矣

道光二十三年癸卯冬十二月

愚弟周

鏞拜題

例言

一所錄皆二十年來見聞所及詳載字姓厯厯可徵聞有逸其名氏者偶忘之耳

一淺易之證尋常治法所能療者概不泛錄

一難辨之證誤藥卽成危候而初病乃能洞燭遽爾霍然雖若無奇不可不錄後學苟能畱意庶免以藥釀病之辜

一病有虛實寒熱治分補瀉溫涼更有補瀉互投之法寒熱並用之宜者以標本異情證因錯雜也此錄諸案具備法無偏倚不媿一代之良工矣

一六氣皆從火化凡外感之邪雖傷寒必以顧陰爲主况溫熱暑燥之病更多於傷寒而熱之灼陰尤爲勢所必然耶觀案中治感多以涼潤清解爲法是參天人一致之理以談醫非泥古耳食之徒所能窺測也

一孟英可傳之案何僅止此惜予未能窮蒐廣討也凡荷其再造之人不妨陸續補刊以推廣仁術而嘉惠來茲匪惟忠厚當然卽是心存濟世故不以上下分帙而以卷一卷二爲次蓋欲卷數之遞增無已耳

一案中辨證固多發人之未發他如論阿片之燥烈傷津豬肉

之柔潤充液之類尤爲有功於世是不僅某藥治愈某病之案
讀者須加咀嚼勿囫圇嚥下也

一孟英雖用藥極平淡而治病多奇中故其辨證處方同道莫
不折服茲所錄案已見一斑附采玉芝丸數方藥易功優更徹
立法之善至爛喉痧方雖從金匱翼錄出而孟英命其名曰錫
類散且聞授其方於莊芝階金愿谷兩中翰修合濟人救全不
少凡屬外淫喉患無不應手而瘳不特爛喉痧藉以爲神丹也
敢不附載以廣其傳乎

[illegible]

王氏醫案卷一 原名回春錄

杭州王士雄孟英著

同郡周

錄光遠

乾薑辛溫故用之以回陽氣若併此不得則令壯盛人以氣呵之亦可救倉卒之變

甲申夏予於登廁時忽然體冷汗出氣怯神疲孟英視之曰陽氣欲脫也卒不及得藥適有三年女佩薑一塊約重四五錢急煎而灌之即安後用培補藥率以參耆朮草為主蓋氣分偏虛也

范慶簪年踰五十素患痰嗽乙酉秋在婺驟然吐血勢頗可危孟英診曰氣虛而血無統攝也雖向來咳嗽陰虧陰藥切不可

服然非格陽吐血附桂更爲禁劑乃以潞參耆朮苓草山藥扁
豆橘皮木瓜酒炒芍藥爲方五帖而安繼去甘草木瓜加熟地
黃黑驢皮膠紫石英麥冬五味子龍骨牡蠣熬膏服之全愈亦
不復發後范旋里數年以他疾終

丙戌春倉夫鄭德順患急證時已二鼓丐孟英視之見其扒牀
拉席口不能言惟以兩手指心抓舌而已孟英曰中毒也取綠
豆二升急火煎清湯澄冷灌之果卽霍然詰朝詢其故始言久
患臂痛因餌草頭藥下嚔後卽心悶不可耐舌麻不能言而旁
人不知也錄此足以徵孟英臨證之燭照如神亦可見草藥之

子每以此法治
陽證瘡毒莫不
應手取效真妙
方也

不可輕試也。

發人羅元奎丁亥夏卒發寒熱旋即嘔吐不能立自言膀胱痛

不可當孟英視其痛處焮赤腫硬形如肥阜筴橫梗於毛際之

左乃曰此證頗惡然乘初起可一擊去之也用金銀花六兩生

甘草一兩阜角刺五錢水煎和酒服之一劑減其勢再劑病若

失逾年患傷寒孟英切脈虛細已極曰此不可徒攻其病者以

陰分太虧耳與景岳法以熟地當歸酒炒白芍炙甘草橘皮柴

胡等藥一劑而瘳

參但表裏止藥胡一味猶嫌力微

子素患噫氣凡體稍不適其病即至既響且多勢不可遏戊子

法本喻氏

元參能滋水以
制火獨用則力
厚取效倍捷

三才圖會 卷一

冬發之最甚苦不可言孟英曰此陽氣式微而濁陰上逆也先服理中湯一劑隨以旋覆代赭湯投之遂愈嗣後每發如法服之輒效後來發亦極輕今已不甚發矣予聞孟英常云此仲聖妙方藥極平淡奈世人畏不敢用殊可陋也

非戴陽證

有患陰虛火炎者面赤常如飲酒之態孟英主一味元參湯其效若神而屢試皆驗

熱甚隨竭之象

鄔人葉殿和庚寅秋患感旬日後汗出昏瞢醫皆束手乃甥余薇垣浼孟英勘之曰此真陰素虧過服升散與仲聖誤發少陰汗同例下竭則上厥豈得引亡陽爲比而以附桂速其斃耶以

元參地黃知母甘草白芍黃連茯苓小麥龜板鼈甲牡蠣驢皮
膠爲大劑投之得愈。

海陽趙子升辛卯夏病瘧急延孟英診之曰暑熱爲患耳不可

膠守於小柴胡也。專○清○暑○邪與白虎湯一啜而瘧甲午秋范麗門患溫瘧。

孟英用白虎加桂枝以痊之丙申夏盛少雲病溼熱瘧孟英以

白虎加蒼朮湯而安己亥夏予舅母患瘧服柴胡藥二三帖後

汗出昏厥妄語遺溺或謂其體質素虛慮有脫變勸服獨參湯

幸表弟壽者不敢遽進乃邀孟英商焉切其脈洪大滑數曰陽

明暑瘧也與傷寒三陽合病同符處竹葉石膏湯兩劑而瘧康

清熱○兼○燥○溼

清○熱○兼○驅○風

清○熱○兼○養○陰○氣

子夏滇人黃肖農自福清赴都道出武林患暑瘧孟英投白虎

○清○熱○氣○與○前○方○意○同

湯加西洋參數帖始愈辛丑秋顧味吾室人病瘧瘧孟英亦主
是方而效莊芝階中翰張安人年踰花甲瘧熱甚熾孟英審視
再四亦與竹葉石膏湯而安聞者無不驚異予謂如此數證體
分南北質有壯衰苟非識證之明焉能藥與病相當而用皆適
宜哉

壬辰八月范蔚然患感旬餘諸醫束手乃弟麗門懇孟英治之
見其氣促音微呃忒自汗飲水下嚥隨卽傾吐無餘曰伏暑在
肺必由溫散以致劇也蓋肺氣受病治節不行一身之氣皆失

妙論不獨治暑
爲然凡上而不
下之證皆可類
推

其順降之機卽水精四布亦賴清肅之權以主之氣既逆而上
奔水亦泛而上溢矣但清其肺則諸恙自安乃閱前服諸方始
則柴葛羌防以升提之火藉風威吐逆不已猶謂其胃中有寒
也改用桂枝乾薑以溫燥之火上添油肺津欲絕自然氣促音
微疑其虛陽將脫也徑與參歸蛤蚧柿蒂丁香以補而納之愈
補愈逆邪愈不出欲其愈也難矣亟屏前藥以瀉白散合清燥
救肺湯數服而平

一何叟年近八旬冬月傷風有面赤氣逆煩躁不安之象孟英
曰此喻氏所謂傷風亦有戴陽證也不可藐視以東洋人參細

个不換正氣散
辛炙甘草熟附片白朮白芍茯苓乾薑五味胡桃肉細茶葱白
一劑而瘳孟英曰此真陽素擾痰飲內動衛陽不固風邪外入
有根蒂欲拔之虞誤投表散一汗亡陽故以真武四逆諸法回
○可○知○用○法○之○周○到○
陽鎮飲攘外安內以爲劑也不可輕試於人致干操刃之辜慎
之慎之

癸巳秋予在婆患瘧大爲醫人所誤初則表散繼則滋補延及
月餘肌肉盡削寒熱不休且善嘔惡食溺赤畏冷乃買棹旋杭
託孟英診視曰足太陰溼瘧也以金不換正氣散三噉而安然
元氣爲誤藥所傷多方調補甫得康健次年秋復患瘧於婆友

人咸舉醫療。予概卻之。憶病情與前無異。卽於篋中檢得孟英原方。按序三帖。病亦霍然。聞者無不稱歎。後歸里爲孟英述而謝之。孟英曰。瘡情如是。恐其按年而作。乃授崇土勝溼丸。方明年夏令。預服以堵禦之。迄秋果無恙。後竟不發矣。

鍾耀輝年踰花甲。在都患腫。起自腎囊。氣逆便溏。諸治不效。急買車返杭。託所親謝金堂邀孟英治之。切其脈微而弱。詢其溺清且長。曰。都中時服其五苓八正耶。抑腎氣五皮也。鍾云。誠如君言。徧嘗之矣。而病反日劇者。何哉。孟英曰。此土虛不制水也。云。理中。加茯苓。附子之證也。通利無功。滋陰亦謬。法宜補土勝溼。與大劑參朮果卽向安。越

八載以他疾終。

金元章媳。於甲午新寡後。患臌窠疥。大抵溼熱之病耳。瘍醫連某疑爲遺毒。徑作廣瘡療。漸至上吐下利。不進飲食。另從內科治。亦無寸效。延至末春。更兼腹痛自汗。汎愆肌削。諸醫皆見而卻走矣。王仲安薦孟英視之。曰。此胃氣爲苦寒所敗。肝陽爲辛熱所煽。前此每服陽剛。卽如昏冒。稍投滋膩。泄瀉必增。遂謂不治之證。未免輕棄。乃以四君子加左金。椒梅蓮子。木瓜餘糧石脂等。出入爲方。百日而愈。第信猶未轉也。諸親友環議。再不通經。病必有變。孟英力辨此非經阻可通之證。惟有培養生化之。

源○使○其○氣○旺○血○生○則○流○行○自○裕○若○不○揣○其○本○而○齊○其○末○則○轉○據○
不○能○榨○油○徒○傷○正○氣○盡○隳○前○功○豈○不○可○惜○眾○議○始○息○恪○守○其○方○
服○至○仲○冬○天○癸○至○而○肌○肉○充○康○復○如○常○矣○

朱某患嘔吐諸藥不效○甚至大小便秘○糞從口出○臭不可當○自
上○者○下○之○之○法○而○重○其○巧
問不起矣○孟英用代赭旋覆湯加蜣螂蟲服之而愈○

孟英邃於醫學○從不侈談脈理○足以見其欲然不自足也○而脈
理之最不易切者○莫如妊娠○予聞孟英於乙未春診黃履吉室
人之脈○曰妊也○是月天癸猶來○人皆不以爲然○次月仍轉○但不
多耳○復邀孟英診之○曰果妊也○汛不斷者○蔭胎之血有餘耳○

娠孕之脈最爲難憑。有初娠卽現於脈者。有三四月始現於脈者。有始終不現於脈者。此與憑脈斷證有時可憑。有時不足憑。同一至理。子嘗以此質之孟英。孟英亦以爲然。可見眞學問人。必不恃虛言以眩世也。

月汛復行。覺更少矣。人猶以爲妄也。四月後經始停。娠亦顯。婉如期。人始服其見老。丙申夏。滿洲某選粵東鹽場。攜眷之任。過浙。主於李雲臺家。請孟英視其如君之恙。孟英診曰。非病也。熊入夢矣。某頗不信。謂經甫停。何以遽斷爲孕。而又必其爲男乎。反生言過其實之疑。旣而某延雲臺入幕。偕赴粵任。次年雲臺於家書中述及居停果得子。深歎孟英指妙。子荆人久無孕。辛丑秋。汛事偶愆。孟英一診。卽以妊斷。且以男許。次夏果舉一子。惜不育耳。邵魚竹給諫仲媳懷妊。孟英於寅春初診。卽許抱孫。秋杪果應。表弟胡壽者室。偶有小忿。經事澹少。腰腹微脹。自

以爲怒氣所滯也。延孟英調之。切其脈曰懷麟矣。初猶疑之。既而始信。卯春果弄璋。吳雲階室年四十餘。寅秋汛斷。其腹日脹。醫謂病也。治之罔效。迺孟英診之。孕也。彼猶不自信。及腹中漸動。始服其言。至期產一女。癸秋孟英治石誦義室。脘痛甫愈。適汛踰期。卽曰娠矣。旣而果日形著。其指下之神妙如此。朱恒山久患胸痞多痰。諸藥罔瘳。孟英診曰。清陽之氣不司旋運也。與參耆苓朮之劑。豁然頓愈。因極欽服。後數年果以汗脫聞其垂危之際。口不能言。猶以左手橫三指。右手伸一指加於上。作王字狀。以示家人。有會其意者。急追孟英至。而他醫之中。

風藥早灌入矣。遂以長逝。癸卯冬至前一日。管大中丞亦是氣從溺脫。當以參附挽回者。及孟英至而痰藥痧藥風藥灌之。遍矣。脈僅若蛛絲過指。孟英堅不與方。須臾而卒。

無棣張柳吟封翁。於乙未夏偕令嗣恒齋刺史赴滇南任。道出武林。其家人鄭九者。封翁寵人之弟也。途次抱恙。抵杭。日招越醫陳六順診治。服藥後汗出昏狂。精流欲脫。封翁大駭。躬詣孟英。以希挽救。孟英切其脈。既數且亂。沈取極細。乃語封翁曰。此證頗危。生機僅存一綫。亦斯人之陰分素虧。不可竟謂附桂之罪也。封翁聞言大悅。曰長者也不斥前手之非。以自伐。不以見

證之險而要譽相見恨晚。遂訂忘年之交。彼此盡吐生平。始知
封翁最喜談醫。岐黃之言。無所不覽。惟不肯爲人勘病。亦慎重
之意耳。於是孟英以元參知藥桑枝龍牡生地白芍甘草百合
石斛梔子鹽水炒淡豆豉爲大劑。灌之下。嚙卽安。次日去梔豉
甘草加龜板鼈甲鹽水炒橘紅十餘帖而康。

吳馥齋令姊稟質素弱。幼時鳳山診之。許其不秀。癸巳失其怙
恃。情懷悒悒。汎事漸愆。寢食皆廢。肌瘦吞酸。勢極可畏。孟英以
高麗參鹽水炒黃連甘草小麥紅棗百合茯苓牡蠣白芍旋覆
花新絳等治之。各恙漸已。繼參歸地滋陰。康強竟勝於昔。

一男子患喉痺。專科治之。甫愈。而通身腫勢日甚。醫者驚走。孟英診之。曰。病藥也。投附子理中湯。數劑而痊。予謂喉痺治以寒涼。法原不謬。而藥過於病。翻成溫補之證。是病於藥也。非病於病也。嘗聞孟英云。病於病而死者十之三。病於藥而死者十之七。以予觀之。誠非激論也。吁。可歎已。

朱氏婦產後惡露不行。而宿嘔頓發。專是科者不能下手。孟英以丹參、桃仁、貝母、茯苓、滑石、花粉、桂枝、通草、蛤壳、苡仁、紫苑、山查、絲瓜子、茺蔚子、旋覆、琥珀。出入爲方。三日而愈。

局醫黃秀元之與人韓名諒者。有兒婦重身患熱病。局中諸醫。

皆慮胎隕。率以補血爲方。旬日後勢已垂危。浼人求孟英診之。曰胎早腐矣。宜急下之。或可冀幸。若欲保胎。則吾不知也。其家力懇疏方。遂以調胃承氣合犀角地黃湯加西洋參麥冬知母石斛牛膝投之。胎落果已臭爛。而神氣卽清熱亦漸緩。次與西洋參元參生地知母麥冬丹參丹皮茯苓山查石斛豆卷菴蔚琥珀等藥調之。粥食日加。旬餘而愈。

一少年驟患遺精數日後形肉大脫連服滋陰瀉精之藥如水此陽浮於上陰孤於下故非滋陰瀉精所能治仲景桂枝龍骨湯能調和陰陽收攝精氣又鍾參耆以建其中故取效甚速

投石孟英與桂枝湯加參耆龍牡服下卽效匝月而瘳

家叔南山於秋閒患感日治日劇漸至神昏譫妄肢振動惕施

秦兩醫皆謂元虛欲脫。議投峻補。家慈聞而疑之。曰。盍與孟英商之。孟英診曰。無恐也。通絡蠲痰。可以卽愈。用石菖蒲。羚羊角。絲瓜絡。冬瓜子。苡仁。桑枝。旋覆。橘絡。葱鬚。貝母。鈎藤。膽星。爲劑。化服。萬氏牛黃清心丸。一顆。覆杯卽安。調理半月而愈。

美政闢毛內使。年踰花甲。而患喘嗽。醫與腎氣湯。全鹿丸等藥。反致小溲滴痛。病日以劇。孟英診之。與純陰壯水之治。毛曰。我輩向吸阿片煙。豈敢服此涼藥。孟英曰。此齊東之野語也。誤盡天下蒼生。幸汝一問。吾當爲世人道破機關。不致誤墮火坑者。再爲積薪貯油之舉也。夫阿片本罌粟花之脂液。性味溫澀。而

又產於南夷之熱地。煎曬以成土。熬煎而爲膏。吸其煙時。還須火煉。燥熱毒烈。不亞於砒。久吸之。令人枯槁。豈非燥烈傷陰之明驗哉。毛極拜服。果得霍然。或問曰。阿片之性。殆與酒相近乎。孟英曰。麴蘖之性雖熱。然人飲之。則質仍化水。故陰虛者飲之。則傷陰。陽虛者飲之。則傷陽。景岳論之詳矣。若阿片雖具水土之質。而性從火變。且人吸之。則質化爲煙。純乎火之氣。燄直行清道。燥人津液。故吸煙之後。口必作渴。久吸則津枯液竭。精血源窮。而宗筋失潤。人因見其陽痿也。不察其所以痿之故。遂指阿片爲性冷之物。抑何愚耶。凡吸阿片煙而醉者。以陳醬少許。

淪湯服卽醒。若熬煙時少著以鹽。卽渙散不凝膏。吸時舌上預
舐以鹽。則不成癮。雖癮深者。但令舐鹽而吸。則癮自斷。豈非潤
下之精。能制炎上之毒乎。

金元章年踰七旬。久患疝厥。每病於冬。以爲寒也。服熱藥而暫
愈。終不能霍然。孟英診曰。脾腎雖寒。肝陽內盛。徒服剛烈。焉能
中肯。以參朮枸杞菴蓉茴香當歸菟絲鹿角霜桂茯苓棟實黃
連吳萸橘核等藥爲方。服之。今數年無恙矣。

丙申春。蜀人石符生。將赴鄧雲厓司馬之招。經杭抱病。僑於張
柳吟之舊館。亦爲寓側。陳六順治困居。停主人知之。卽告以柳

吟僕病之事。石聞之悚然。亟遣人延孟英診焉。脈沈而澀。滯。糊。不分。至數肢涼。畏冷。涎沫上涌。二便瀟少。神氣不爽。曰。此途次感風溼之邪。失於解散。已從熱化。加以溫補。致氣機愈形窒塞。邪熱漫無出路。必致燥液成痰。逆行而上。但與舒展氣機。則痰行熱降。諸恙自瘳矣。以黃連。黃芩。枳實。橘皮。梔子。淡豉。桔梗。杏仁。貝母。鬱金。通草。紫苑。竹茹。蘆薈。汁等藥。三服而起。調理匝旬。遂愈。

夏間王某患感。越醫謝樹金治之。病雖退而能食矣。但不能起坐。類乎癱瘓。延已月餘。人皆謂其成廢。所親鍾某。浼孟英視之。

曰此多服表散汗出過分氣血兩傷肢骸失其營養脈微而細
舌亮無苔與大劑參耆歸朮熟地杜仲菟絲牛膝枸杞山藥木
○液○陰○分○偏○偏○也○

瓜蒌肉菱蕤續斷桑枝數十帖而起

一勞力人陰分素虧驟感風溼兩膝刺痛痠爽不能稍立孟英

以六味地黃湯加獨活豆卷一劑知二劑已

張養之令正飲食如常而肌膚消瘦信事如期而紫淡不恒兩
腓發熱而別處仍和面色青黃而隱隱有黑氣儼似虛寒多藥
不效始逆孟英診之脈似虛細而沈分略形絃滑曰此陽明有
餘少陰不足土燥水涸仲聖有急下存陰之法然彼外感也有

孟英善用甘寒
投之此證尤宜

餘○之○邪○可○以○直○瀉○此○內○傷○也○無○形○之○熱○宜○以○甘○寒○義○雖○同○而○藥○
則○異○也○贈○以○西○洋○參○生○地○生○白○芍○生○石○膏○知○藥○苓○梔○麥○冬○花○粉○
棟○實○丹○皮○木○通○天○冬○諸○品○服○至○數○斤○黑○氣○退○而○肌○漸○充○腠○熱○去○
而○經○亦○調○矣○

姚○氏○婦○產○後○昏○譫○汗○厥○肌○膚○浮○腫○醫○投○補○虛○破○血○祛○祟○安○神○之○
藥○皆○不○能○治○舉○家○惶○怖○轉○延○孟○英○診○焉○詢○知○惡○露○仍○行○曰○此○證○
醫○家○必○以○爲○奇○病○其○實○易○愈○也○昔○金○尚○陶○先○生○曾○治○一○人○與○此○
相○似○載○於○沈○堯○夫○女○科○輯○要○中○方○用○石○菖○蒲○膽○星○旋○覆○茯○苓○橘○
紅○半○夏○麴○名○蠲○飲○六○神○湯○凡○產○後○惡○露○行○而○昏○譫○者○多○屬○痰○飲○

不可誤投攻補。此湯最著神效。如方服之。良愈。

牙行王炳華妻患舌瘡痛礙飲食。內治外敷皆不效。孟英視其舌色紅潤。脈形空數。曰。此血虛火浮也。以產後發熱例施。用熟地當歸酒炒。白芍炙甘草。茯苓炮薑投之。其病如失。

一老人霍亂後。目閉呃忒。醫謂脫陷在卽。與桂附回陽之藥。業已煎矣。適孟英至。詢知溺赤口乾。診得脈形爽數。而藥香撲鼻。卽曰。此藥中有肉桂。叟勿服也。服之必死。迫令將藥傾潑。而與肅肺清胃之劑。果得漸安。

丁酉中秋夜。牙行張鑑錄年踰花甲。卒仆於地。急延孟英脈之。

弦滑而大曰痰氣食相併而逆於上也。先以烏梅擦開牙關。橫一竹箸於口。灌以淡鹽薑湯。隨入驚翎探之。吐出痰食。太息一聲而甦。次與調氣和中而愈。後數年以他疾終。此案雖無奇而辨證之明。不可不錄。

姚樹庭以古稀之年而患久瀉。羣醫雜治不效。僉以爲不起矣。延至季秋。邀孟英決行期之早晚。非敢望愈也。孟英曰。絃象獨見於右關。按之極弱。乃土虛木賊也。調治得法。猶可引年。何以遽爾束手乎。乃出從前諸方閱之。皆主溫補升陽。曰理原不背。義則未盡耳。如薑附肉蔻骨脂之類。氣熱味辣。雖能溫臍反助。

諸語精義由此
無推可以知用
藥之權衡矣

肝陽肝愈強則脾愈受戕且辛走氣而性能通泄與脫者收之
之義大相刺謬而鹿茸升麻可治氣陷之瀉而非幹旋樞機之
品至熟地味厚滋陰更非土受木尅脾失健行之所宜縱加砂
仁酒炒終不能革其膩滑之性方方用之無怪乎愈服愈瀉徒
藉景岳窮必及腎爲口實也與異功散加山藥扁豆蓮子烏梅
○者○其○與○病○證○針○錄○相○對○處
木瓜芍藥茯苓石脂餘糧服之果效恪守百日竟得康強越三
載以他疾終

戊戌春張雨農司馬必欲孟英再赴環山孟英因其受病之深
且公事掣肘心境不能泰然誠非藥石之可以爲力也固辭不

往司馬泣然哀懇。但冀偕行旋署。則任君去畱可耳。并囑趙蘭舟再四代陳曲悃。孟英感其情。同舟渡江。次剡溪。司馬譚及體氣羸憊情形。孟英忽曰。公其久不作嚏乎。司馬曰。誠然有年矣。此曷故也。孟英曰。是陽氣之不宜布耳。古惟仲景論及之。然未立治法。今擬鄙方奉贈。博公一嚏。如何。司馬稱善。遂以高麗人參、乾薑、五味、石菖蒲、酒炒薤白、半夏、橘皮、紫苑、桔梗、甘草爲劑。舟行抵嵎。登陸取藥煎而服之。駕輿以行。未及二十里。司馬命從人詣孟英車前報曰。已得嚏矣。其用藥之妙如此。夏間牙行倪懷周室新產數日。泄瀉自汗嘔吐不納。專科謂犯

三○禁○不○敢○肩○任○孟○英○診○脈○虛○微○欲○絕○證○極○可○虞○宜○急○補○之○遲○不
及○矣○用○東○洋○參○耆○朮○龍○牡○酒○炒○白○芍○桑○枝○木○瓜○扁○豆○茯○神○橘○皮○
紫○石○英○黑○大○豆○投○之○四○劑○漸○以○向○安○予○謂○新○產○後○用○參○耆○大○補○
而○又○當○盛○夏○之○時○非○有○真○知○灼○見○者○不○能○也○誠○以○天○下○之○病○千
變○萬○化○原○無○一○定○之○治○奈○耳○食○之○徒○惟○知○執○死○方○以○治○活○病○豈
非○造○孽○無○窮○亦○何○苦○人○人○皆○欲○爲○醫○而○自○取○罪○戾○耶○

張○養○之○令○姪○女○患○汛○愆○而○飲○食○漸○減○于○某○與○通○經○藥○服○之○尤○惡
穀○請○孟○英○診○之○脈○緩○滑○曰○此○痰○氣○凝○滯○經○隱○不○宜○病○由○安○坐○不
勞○法○以○豁○痰○流○氣○勿○投○血○藥○經○自○流○通○于○某○聞○而○笑○曰○其○人○從○

不吐痰血有病而妄治其氣。脹病可立待也。及服孟英藥。果漸吐痰而病遂愈。養之大爲折服。予謂世人頭痛治頭。腳疼療腳。偶中而愈。貪爲己功。誤藥而亡。冤將奚白。此寓意草之所以首列議病之訓也。孟英深得力於喻氏。故其議病。迥出凡流。要知識見之超總。由讀書而得。雖然。人存政舉。未易言也。

毛允之戊冬患感。初治以溫散。繼卽以滋陰。病日以劇。延至亥春。或疑爲百日之勞。或謂是傷寒壞證。而鳳山僧主升柴者。水以補之。丁卯橋用輕粉巴霜以下之。雜藥徧投。形神日瘁。乃尋學周延孟英視之。脈來澀數上溢。呃忒口膩。雖覺嗜飲而水難

下○膈○頻○吐○涎○沫○便○祕○溺○赤○潮○熱○往○來○少○腹○如○烙○按○之○亦○不○堅○滿○
曰○此○病○原○屬○冬○溫○治○以○表○散○則○津○液○傷○而○熱○乃○熾○繼○以○滋○填○熱○
邪○愈○錮○再○施○溫○補○氣○機○更○窒○升○柴○耆○水○欲○升○其○清○而○反○助○其○逆○
巴○霜○輕○粉○欲○降○其○濁○而○盡○刮○其○陰○病○及○三○月○發○熱○不○是○表○邪○便○
祕○旬○餘○結○滯○非○關○積○滯○且○脈○澀○爲○津○液○之○已○傷○數○是○熱○邪○之○留○
著○溢○乃○氣○機○爲○熱○邪○所○壅○而○不○得○下○行○豈○非○溫○邪○未○去○得○補○而○
膠○固○難○除○徒○使○其○內○燥○真○陰○上○薰○清○道○以○致○一○身○之○氣○盡○失○肅○
清○之○令○法○當○搜○剔○餘○邪○使○熱○去○津○存○卽○是○培○元○之○道○伸○其○治○節○
俾○濁○氣○下○趨○乃○爲○宣○達○之○機○何○必○執○參○茸○爲○補○虛○指○硝○黃○爲○通○

清熱生津治法
因善然亦此人
本元堅固故屢
誤之後猶能挽
回否則亦難為
力矣

祛痰清熱滋陰
續奮力量甚大
此必本虛標實
者故其方如此

降○哉○以○北○沙○參○紫○苑○麥○冬○知○母○花○粉○蘭○草○石○斛○丹○皮○黃○芩○桑○葉○
○厄○子○黃○連○木○通○銀○花○橘○皮○竹○茹○蘆○根○檳○榔○枳○杷○葉○地○栗○海○蛇○等○
○出○入○為○方○服○之○各○恙○遞○減○糜○粥○漸○加○半○月○後○始○得○大○解○而○腹○熱○
○全○消○穀○食○亦○安○乃○與○滋○陰○善○後○而○愈○

張○養○之○所○親○李○某○戊○冬○醉○飲○夜○歸○為○查○段○巡○員○所○嚇○神○志○卽○以○
○漸○昏○治○之○罔○效○至○於○不○避○親○疎○裸○衣○笑○罵○力○大○無○制○糞○穢○不○知○
○已○夏○延○孟○英○視○之○用○石○菖○蒲○遠○志○龍○齒○龜○板○犀○角○羚羊○角○元○參○
○丹○參○知○藥○厄○子○龍○膽○草○枳○實○黃○連○竹○黃○竹○瀝○石○膏○赭○石○黑○鉛○鐵○
○落○出○入○為○方○十○餘○帖○吐○瀉○膠○痰○甚○多○繼○與○磁○硃○丸○漸○以○向○愈○

一祝叟年近古稀已亥春赴席忽仆地痰涌肢強眼斜舌蹇不語○外科王瑞芝薦孟英視之投六君子加蠟稍羚羊角膽星石菖蒲竹瀝薑汁而瘳○

茅家埠翁嘉潤患腰疽愈而復發者五年費用不貲諸瘍醫治之不效盛少雲囑其求治於孟英切其脈絃細以數日子之幸也此內損證○外科惡乎知與大劑甘潤滋填之藥匝月而痊至今不發○

胡琴泉舅氏家一潘嫗年踰古稀患霍亂轉筋瀕危孟英用自制蠶矢湯而瘳○

一少婦分挽胞水早破胎澀不能下俗謂之瀝漿生催生藥遍
試不應孟英令買鮮豬肉一二斤洗淨切大塊急火煎湯吹去
浮油恣飲之卽產母子皆生且云豬爲水畜其肉最腴大補腎
陰而生津液予嘗用治腎水枯涸之消渴陰虛陽越之喘嗽竝
著奇效仲聖治少陰咽痛用豬膚亦取其補陰虛而戢浮陽也
後賢不察反指爲有毒之物汪詡庵非之是矣惟外感初愈及
虛寒滑瀉溼盛生痰之證概不可食以其滋膩更甚於阿膠熟
地龍眼也然豬以浙產者爲良北豬不堪用吾杭燥肉鮓卽豬
皮爲之可以致遠八藥尤爲簡當不必泥於皮與膚之字面而

穿鑿以誇考據也。

秋初家慈猝仆於地。急延孟英診之。脈浮絃以滑。用羚羊角、膽星、牡蠣、石菖蒲、丹參、茯苓、鈎藤、桑葉、貝母、橘紅、蒺藜等以順氣。獨痰息風降火而痊。癸卯春前數日忽作。欠伸而厥。孟英切脈微弱而絃。曰病雖與前相似而證則異矣。以高麗參、白朮、何首烏、山茱萸、枸杞、桑甚、石斛、牛膝、蒺藜、橘紅、牡蠣等鎮補攝納。以瘳。予謂此等證安危在呼吸之間。觀前後卒仆數案。可見其辨證之神。雖古人不多讓。况世俗之所謂醫乎。家慈兩次類中。予皆遠出。微孟英吾將焉活。感銘五內。聊識數言。惟願讀是書者。

體其濟世之心。臨證得能如是。將胥天下之沈疴而盡起矣。張養之弱冠失怙。後卽遭无妄之疾。繼絲七載。罄其貲財。經百十三醫之手。而病莫能愈。因廣購岐黃家言。靜心參考。居然自療。而痊然鼻已壞矣。抱此不白之冤。自慙形穢。乃閉戶學書。專工作楷。其志良可悼也。孟英因與之交。見其體怯面青。易招外感。夏月亦著複衣。頻吐白沫。詢知陽痿多年。常服溫辛之藥。孟英屢諫之而已。亥九月閒。患惡寒頭痛。自餌溫散不效。逆孟英診之。脈極沈重。按至骨則絛滑隱然。臥曲房密帳之中。爐火重裘。尙覺不足以禦寒。且涎沫仍吐。毫不作渴。胸腹無脹悶之苦。

咳嗽無暫輟之時。惟大解堅燥。小溲不多。口氣極重耳。乃謂曰。此積熱深。鋼氣機鬱而不達。非大苦寒以瀉之。不可也。養之初猶疑焉。及見方案。辨論滔滔。乃大呼曰。弟之死生。係乎一家之命。唯君憐而救之。孟英慰之曰。我不惑外顯之假象。而直斷爲實熱之內蘊者。非揣度之見。而確有脈證可憑。但請放心靜養。不必稍存疑畏。及二三帖後。病不略減。諸友戚皆詆藥偏於峻。究宜慎重服之。有于某者。揚言於其族黨曰。養之之命。必送於孟英之手矣。眾楚交咻。舉家惶惑。次日另延陳啓東暨俞某。並診。孟英聞之急詣病榻前。謂曰。兄非我之知己也。則任兄服誰。

之藥。我不敢與聞也。兄苟裕如也。則任兄廣徵明哲。我不敢阻撓也。今兄貧士也。與我至交也。拮据資囊。延來妙手。果能洞識病情。投劑必效。則我亦當竭力慫恿也。第恐雖識是病。而用藥斷不能如我之力專。而劑大也。苟未能確識是證。而以無毀無譽之方。應酬塞責。則因循養患。誰任其咎也。或竟不識是病。而開口言虛。動手卽補。甘言悅耳。兄必信之。我不能坐觀成敗。如秦人視越人之肥瘠也。今俞某之方如是。陳醫殊可卻之。速著人趕去辭絕。畱此一款。以作藥資。不無小補。况連服苦寒病無增減。是藥已對證。不比平淡之劑。誤投數帖。尙不見害也。實由

熱伏深錮。藥未及病。今日再重用硝黃犀角。冀頑邪蘊毒得以
通泄下行。則周身之氣機自然流布矣。養之伏枕恭聽。大爲感
悟。如法服之。越二日大便下如膠漆。穢惡之氣達於戶外。而畏
寒卽以遞減。糜粥日以加增。旬日後糞色始正。百日後康健勝
常。嗣後雖嚴冬亦不甚畏冷。偶有小恙。輒服清潤之方。陽道復
興。近添一女。養之嘗頌於人曰。孟英之手眼。或可得而學也。孟
英之心地。不可得而及也。我之病奇病也。孟英雖具明眼。而無
此種熱情勢。必築室道旁。亂管藥餌。不能有今日矣。況不但有
今日。而十餘年深藏久伏之疴。一旦掃除。自覺精神勝昔。可爲

此是熱痰伏於
肺絡故用藥如
此

後日之根基再生之德不亦大哉。

孫午泉進士患哮喘痰多氣逆不能著枕服溫散滋納藥皆不效。
孟英與北沙參桂枝茯苓貝母花粉杏仁冬瓜仁絲瓜絡枇杷
葉旋覆海石蛤壳等藥覆杯即臥數日而痊。

石符生隨乃翁自蜀來浙同時患瘧醫者以小柴胡湯加薑桂
投之不效改用四獸休癰等法反致惡寒日甚穀食不進惟飲
燒酒薑湯圍火榻前重裘厚覆胸腹痞悶喜以熱熨猶覺冷氣
上衝頻吐粘稠痰沫延至臘初疲憊不堪始憶及丙申之恙訪
孟英過診脈沈而滑數苔色黃膩不渴便溏溺赤曰是途次所

受之暑溼。失於清解。復以溫補之品。從而附益之。釀成痰飲。盤踞三焦。氣機爲之阻塞。所以喜得熱熨。熱飲。氣衝反覺如冰。若不推測其所以然之故。而但知聞問在切脈之先。一聽氣冷。喜熱。無不以爲真贗現。獲孰知病機善幻。理必合參。以脈形兼證。竝究則其爲真熱假寒。自昭昭若揭矣。與大劑苦寒之藥。而以蘆薈湯煎。漸服。漸不畏寒。痰漸少。穀漸增。繼用甘涼善後。喬梓皆得安痊。

王氏醫案卷二 原名回春錄

杭州王士雄孟英著

同郡周 錄光遠輯錄

庚子春戴氏婦產後惡露不多。用山查益母草酒煎連服數日。遂發熱自汗。口渴不饑。眩暈欲脫。徹夜不眠。孟英視之曰。此稟屬陰虧。血已隨胎而去。雖惡露甚少。但無脹痛之苦者。不可妄投藥餌。酒煎益母山查。不特傷陰。且能散氣。而汗泄口乾。津液有立竭之勢。卽仲聖所謂無陽也。蓋人身天真之氣。謂之陽。陽根於津。陰化於液。津液既奪。則陽氣無根而眩暈。陰血不生而

無寐。若補氣養陰。則舍本求末。氣血不能生津液也。惟有澄源。潔流。便津液充。而氣血自復。庶可無憂。以西洋參、生黃耆、龍骨、牡蠣、萎蕤、百合、甘草、麥冬、生薏苡、生扁豆、石斛、木瓜、桑葉、蕉漿、投之一劑。卽安。數日而愈。後以滋填陰分服之。乃健。

王某久患吐血。體極孱弱。沈琴癡囑其丐孟英治之。服藥甫有小愈。而酷暑之時。陡患霍亂。轉筋。大汗如雨。一息如絲。孟英視曰。陰血久奪。暑熱鴟張。吾霍亂論中之缺典也。姑變法救之。用北沙參、枇杷葉、龍牡、木瓜、扁豆、苡仁、滑石、桑葉、蠶砂、石斛、豆卷。投之。良愈。調理每日仍服滋補。以治宿恙。越二載。聞服溫補藥。

致血暴涌而亡。

赤山埠李氏女素稟怯弱。春閒汛事不行。脇腹聚氣如癢。減餐肌削。屢服溫通之藥。至孟秋加以微寒。壯熱醫仍作經閉治。勢瀕於危。乃母託伊表兄林豫堂措辦後事。豫堂特請孟英一診。以決之。孟英切其脈時。壯熱烙指。汗出如雨。其汗珠落於脈枕。上微有粉紅色。乃曰。虛損是其本也。今暑熱熾盛。先當治其客邪。庶可希冀。疏白虎湯加西洋參元參竹葉荷桿桑葉及何醫至一籌莫展。聞孟英主白虎湯。乃謂其母曰。危險至此。尙可服石膏乎。且本草於石膏條下致戒云。血虛胃弱者禁用。豈彼未

之知也。豫堂毅然曰：我主藥與其束手待斃，盍從孟英死裏求生之路耶？遂服二帖，熱果退，汗漸收，改用甘涼清餘熱，日以向安繼與調氣養營陰宿痼亦消，培補至仲冬，汛至而痊。次年適孫夔伯之弟。

張氏婦患氣機不舒，似喘非喘，似逆非逆，似太息非太息，似虛促非虛促，似短非短，似悶非悶，面赤眩暈，不饑不臥，補虛清火，行氣消痰，服之不應。孟英診之曰：小恙耳，旬日可安，但須懲忿，是囑與黃連、黃芩、梔子、棟實、鼈甲、羚羊角、旋覆、赭石、海蛇、地栗爲大劑，送當歸龍薈丸，未及十日，汛至其色如墨，其病已若失。

後與養血和肝調理而康。

牙行王炳華室夏患臂痛孫某曰風也服參耆歸芍數帖臂稍愈而腕痛孫曰寒也加以附桂痛不止而漸覺痰多孫曰肝腎不足也重用熟地枸杞令其多服取效不料愈服愈劇漸至昏厥孫尙以爲藥力之未到病體之久虛前方復爲加重甚而時時發厥始請孟英診之脈沈而有絃滑且數之象乃謂炳華曰此由過投溫補引動肝風煽其津液爲痰痰復乘風而上此暈厥之由來也餘波則奔流經絡四肢因而抽搐陽氣盡逆於上宜乎鼻塞面浮濁氣不能下達是以便滯不饑炳華曰神見也。

溫補藥服幾三月矣。不知尙可救乎。孟英曰。勿疑吾藥。猶有望焉。遂與大劑甘寒。息風化飲。佐以涼苦。泄熱清肝。厥果漸止。各恙遞蠲。兩月後康復如常。予偶於舊書中。檢得無名氏鈔本一冊。所錄多岐黃之言。內一條云。附桂回陽。在一二帖之間。萬一誤投。害亦立至。功過不掩。其性之毒烈也。概可見矣。奈世人不。知藥爲治病。而設徒以貪生畏死之念。橫於胸中。遂不暇顧及。體之有病無病。病之在表在裏。但聞溫補之藥。無不欣然樂從者。模稜之輩。趨就存心。知其死於溫補。而無怨悔也。乃衣鉢相傳。不必察其體病脈證之千頭萬緒。僅以溫補之品二十餘味。

相迭爲用。卽成一媚世之方。且託足金匱之門。摹擬腎氣之變。盡知熟地之陰柔。可縛附桂之剛猛。誤投不致卽敗。偶中又可邀功。包藏禍心。文姦飾詐。何異新莽比周。公子雲學孔聖哉。人以其貌古人而口聖賢也。多深信而不疑。迨積薪旣厚。突火頓燃。雖來爛額焦頭之客。其不至於焚身者幸矣。較彼孟浪之徒。誤投純陽藥。致人頃刻流血而死者。其罪當加十等。誅心之論。收世之言。知我罪我。不遑計焉。孟英見之。拜讀千過。且曰。勦漢學以欺世。由來久矣。徐靈胎之論。無此透徹。可與退之原道文並峙。當考其姓字。於仲景先師廟內。建護聖祠以祀之。予謂孟

英如此稱許。則其可傳也。奚疑。故附刊此案之後。以證王氏婦
溫補藥服及三月。卽所謂陰柔束縛剛猛之故。致人受其愚而
不覺者。後之人可以鑑矣。

莊牛霞芝階中翰之三郎也。闡後患感。日作寒熱七八次。神氣
昏迷。微斑隱隱。醫者無策。始迎孟英視之。曰。此平昔飲酒積熱
深蘊。挾感而發。理從清解。必誤投溫補。以致熱勢披猖。若是詢
之果三場。皆服參。且攜棗子浸燒酒入闡。初病尙不至此。因連
服羌防薑桂。漸以滋甚。孟英曰。是矣。先以白虎湯三劑。斑化而
寒熱漸已。繼用大苦寒之藥。瀉其結熱。所下黑矢。皆作棗子氣。

原口痛虛熱在
胃也補虛則礙
熱清熱則妨虛
茲又加以食積
尤爲棘手須看
其用藥圖到處

旬日後與甘潤滋濡之法兩月始得全愈。

金愿谷舍人次郎魁官九月閒患五色痢日下數十行七八日
來口噤不納腹痛呻吟危在旦夕矣有主人參以補之者有主
生軍以蕩之者舉家皇皇不知所措孟英視之曰暑挾食耳誤
服熱藥矣攻補皆不可施也輕清取之可卽愈焉以北沙參黃
連鮮蓮子梔子黃芩枇杷葉石斛扁豆銀花桔梗山查神麴滑
石爲方其家以爲病深藥淡恐不濟事西席莊曉村云縱使藥
不勝病而議論極是定不致加病也竭力贊其居停投之覆杯
卽安旬日而起予聞孟英嘗曰蓮子最補胃氣而鎮虛逆若反

胃○由○於○胃○虛○而○氣○衝○不○納○者○但○日○以○乾○蓮○子○細○嚼○而○嚥○之○勝○於○
他○藥○多○矣○凡○胃○氣○薄○弱○者○常○服○玉○芝○丸○能○令○人○肥○健○至○痢○證○噤○
口○皆○是○熱○邪○傷○其○胃○中○清○和○之○氣○故○以○黃○連○苦○泄○其○邪○即○仗○蓮○
子○甘○鎮○其○胃○今○肆○中○石○蓮○皆○偽○味○苦○反○能○傷○胃○切○不○可○用○惟○鮮○
蓮○子○煎○之○清○香○不○渾○鎮○胃○之○功○獨○勝○如○無○鮮○蓮○則○乾○蓮○亦○可○用○
或○產○蓮○之○地○湖○池○中○淘○得○入○水○不○腐○之○老○蓮○即○古○所○謂○真○石○蓮○
也○昔○人○治○噤○口○痢○多○用○此○然○可○不○必○拘○泥○庶○免○作○偽○之○人○以○假○
亂○真○反○致○用○而○無○效○徒○使○病○不○即○愈○也○

附 玉芝丸

孟英

肺熱夜熱原有
肺熱血瘀二候
斷非滋陰所能
愈况溫病之後
咳嗽夜熱顯爲
遺邪在肺滋陰
藥愈及干涉矣

豬脂一具治淨以蓮子去心入豬內水煎糜爛收乾搗爲
丸服

陳足甫稟質素弱。上年曾經吐血。今夏患感之後。咳嗽夜熱。飲食漸減。醫作損治。滋陰潛陽。久服不效。秋杪孟英診之。曰陰分誠虛。第感後餘熱逗留於肺。阻氣機之肅降。搏津液以爲痰。此關不清。雖與滋填培補之藥。亦焉能飛渡而行其事耶。先清肺氣。以保胃津。俾治節行而灌溉輪。然後以甘潤濃厚之法。補真陰。始克有濟。乃尊仰山聞之。擊節歎服。如法施之。果漸康復。胡蔚堂舅氏年近古稀。患囊腫小洩。赤短寒熱如瘧。孟英曰。非

外感也。乃久蘊之溼熱下流。氣機尙未宣泄。與五苓合滋腎。加
棟實。梔子。木通。兩劑後。囊間出腥粘黃水甚多。小溲漸行。寒熱
亦去。繼與知蘖。八味。去山藥。萸肉。加卮子。棟實。芍藥。苡仁等。久
服而愈。壬寅夏。感受暑溼。誤投溫散。以致譫語神昏。勢瀕於危。
而肛前囊後之間。潰出腥膿。瘡口深大。瘍科以爲懸癰也。敷治
罔效。時孟英患疔。未痊。予固邀其扶病一診。孟英曰。懸癰乃損
怯證。成之以漸。今病來迅速。腥穢異常。是身中久蘊厚味溼熱
之毒。挾外受之暑邪。無所宣泄。下注而爲此證。切勿敷藥。以遏
其外走之勢。但舌強而紫赤。脈細而滑數。客邪熾盛。伏熱蘊隆。

陰分甚虧。深虞津涸。先與清營之劑。三投而神氣漸清。次以涼潤。陽明便暢而熱獨膿。淨改用甘柔滋養。月餘潰處肌平善後。參入參耆。竟得康強如昔。

汪吉哉久瘥不愈。醫謂元氣已虛。雜投溫補。漸至肌瘦內燔。口乾咳嗽。寢汗溺赤。飲食不甘。孟英視之曰。餘邪逗留血分也。與秦艽龍甲散而瘳。其堂兄養餘亦患瘥。數月多醫療之罔效。肌瘦自汗。腰膝痠軟。不能稍坐。極其畏冷。孟英曰。此大虛證。胡反不補。猶以消導。是何居心。與參耆。水葦。熟地。白芍。五味。杜仲。山藥。龍骨。牡蠣。桂枝。大棗。木瓜。服數十帖而起。

眼前道理而人多不悟一經拈出便成名論此與以針治虛損者同一悖謬

孟英治其令叔高年痰嗽喘逆礙臥肢冷顙紅飲食不進與真武湯而安

惡寒例治法

湖墅張春橋素稟不堅頭眩腦鳴頻服溫補藥甚覺畏冷人皆謂其體偏於寒也辛丑春始請孟英診之脈甚數曰陰虧也溫補非宜改服滋水培元之劑頗為有效夏間或勸以炙火云可以除百病蓋未知灼艾之可以除百病者謂可除寒溼凝滯陽氣不能宣通之證非謂內傷外感一切之病皆可炙以除之也故仲景有微數之脈慎不可炙之訓正以艾火大能傷陰也炙後數日即寒少熱多宛如瘧疾醫者以為脾寒病投以溫散日

以滋甚。春橋知藥治未符。堅不肯服。乃父與之詢其故。漫曰。要
兒服藥。須延王先生診視。與之遂邀孟英治之。切其脈滑數倍。
加曰。陰虛之體。內熱自生。炙之以艾。火氣內攻。時當溽暑。天熱
外燦。三者相交。陰何以堪。再投溫散。如火益熱。當從痺瘡治。專
以甘寒息熱。則陰津不致枯涸。而寒熱不攻自去。所謂治病必
求其本也。竟不用一分表散藥而治愈。

棲流所司藥陳芝田。於仲夏患感。諸醫投以溫散。延至旬日。神
昏識妄。肢搐耳聾。舌黑唇焦。囊縮溺滴。胸口隱隱微斑。一望而
知其危矣。轉邀孟英診之。脈細數而促。曰。陰虧熱熾。液將涸矣。

一淚甘寒之藥
既可滌熱又以
生津真治溫良
法也惟溼溫證
宜稍加斟酌耳

遂用西洋參元參生地二冬知藥棟實石斛白芍甘草稍銀花
木通犀角石菖蒲大劑投之次日復診其家人云七八日來小
未○有○也○
溲○不○過○涓○滴○昨○藥○服○六○七○個○時○辰○後○解○得○小○溲○半○杯○孟○英○曰○此○
即○轉○機○也○然○陰○氣○枯○竭○甘○涼○濡○潤○不○厭○其○多○於○前○方○再○加○龜○板○
鼈○甲○百○合○花○粉○大○鍋○煎○之○頻○灌○勿○歇○如○是○者○八○日○神○氣○始○清○諸○
恙○悉○退○純○用○滋○陰○之○藥○調○治○匝○月○而○瘳○予○謂○孟○英○學○識○過○人○熱○
腸○獨○具○凡○遇○危○險○之○候○從○不○輕○棄○最○肯○出○心○任○怨○以○圖○之○如○此○
案○八○日○後○神○氣○始○清○若○經○別○手○縱○使○治○法○不○錯○而○一○二○帖○後○不○
甚○起○色○必○規○避○堅○辭○致○病○家○惑○亂○謀○及○道○旁○雖○不○死○於○病○亦○必○

死於藥矣。此在醫者之識。老心堅。又須病家之善於擇而任之。專也。談何易耶。且聞孟英嘗云。溫熱液涸神昏。有投犀角地黃等藥至十餘劑。始得神清液復者。因溫熱案最夥。不暇詳錄。姑識此以告司人之命者。

江小香病勢危篤。渙人迎。孟英診之。脈虛絃而小。數頭痛偏於左。後子夜熱躁肢冷。欲嘔口乾。不欲飲。不饑。不欲食。舌塞言清。溺黃而頻。曰。體屬素虛。此由患感時過投溫散。陰津陽氣皆傷。後來進補而勢反日劇者。滋膩妨其中運。剛烈動其內風。以致醫者僉云。表之不應。補亦無功。竟成無藥可治之證。雖然。不過

從陰引陽從陽
引陰絕妙機軸

難治耳。未可遽棄也。與秋石水拌制。高麗參。菴蓉。首烏。生白芍。
牡蠣。棟實。鹽水炒。橘紅。桑甚。石斛。蒺藜。茯苓。煎吞飯丸。肉桂心。
五分。一劑。躁平。嘔止。各恙皆減。連投數服。粥食漸安。乃去首烏。
桂棟。加砂仁。末拌炒熟。地菊花。枸杞。半月而瘳。
溽暑之令。瘡疹盛行。幼科僅知套藥。升柴防葛。亂施。殆亦疫癘
之病。造化默行。其殺運歟。陳仰山家患此者十餘人。其長郎書
芾。孝廉之女。勢最劇。以瘡甫出。而汛至也。醫者卻走。始延孟英。
視之。脈滑而數。舌絳大渴。面赤失音。不食便瀉。曰。此由發散太
過。火盛風熾。氣血兩燔。氣分之邪由瀉而略泄。其燄營分之熱。

由汎而稍解其焚。豈可畏其脫陷。妄投止瀝耶。與西洋參、石膏、知母、麥冬、犀角、生地、連翹、甘草、石斛、丹皮、桑葉、竹葉、大劑投之。三日而愈。養陰善後。遂以漸安。其餘或輕或重。孟英一以清解而痊。

石誦義夏杪患感。多醫廣藥。病勢日增。延踰一月。始請孟英診焉。脈至右寸關滑數。上溢左手絃數。耳聾口苦。熱甚於夜。胸次迷悶。頻吐粘沫。啜飲咽喉阻塞。便溏溺赤。聞有譫語。曰此暑熱。始終在肺。竝不傳經。一劑白虎湯可愈者。何以久延至此也。乃尊北涯出前所服方見示。孟英一一閱之。惟初診顧聽泉用清

解肺衛法爲不謬耳。其餘溫散升提滋陰涼血各有來歷。皆費心思。原是好方。惜未中病。而北涯因其澹泄。見孟英君石膏以爲治。不敢與服。次日復診。自陳昨藥未投。惟求另施妥法。孟英曰。我法最妥。而君以爲未妥者。爲石膏之性寒耳。第藥以對病。爲妥。此病舍此法。別無再妥之方。若必以摸稜迎合爲妥。恐賢郎之病不妥矣。北涯聞而感悟。頗有姑且服之之意。而病者偶索方一看。見首列石膏。卽曰。我胸中但覺一團冷氣。湯水皆須熱呷。此藥安可投乎。堅不肯服。然素仰孟英手眼。越日仍延過診。且告之故。孟英曰。吾於是證。正欲發明。夫邪在肺經。清肅之

論亦根概喻氏
而更加明透

令不行津液凝滯結成涎沫盤踞胸中升降之機亦窒大氣僅
能旁趨而轉旋是一團涎沫之中爲氣機所不能流行之地其
覺冷也不亦宜乎且予初診時卽斷爲不傳經之候所以尙有
今日而能自覺胸中之冷若傳入心包則舌黑神昏纔合吳古
年之犀角地黃矣然雖不傳經延之踰月熱愈久而液愈涸藥
愈亂而病愈深切勿以白虎爲不妥急急投之爲妙於是有敢
服之心矣而又有入云曾目擊所親某石膏甫下嚔而命亦隨
之况月餘之病耳聾泄瀉正氣已虧究宜慎用北涯聞之惶惑
仍不敢投乃約翼日廣徵名士會商可否比孟英往診而事

畢至且見北涯求神拜佛意亂心慌殊可憐憫欲與眾商權恐轉生掣肘以誤其病遂不遑謙讓援筆立案云病既久延藥無小效主人之方寸亂矣予三疏白虎而不用今仍赴招診視者欲求其病之愈也夫有是病則有是藥諸君不必各抒高見希原自用之愚古云鼻塞治心耳聾治肺肺移熱於大腸則爲腸癖是皆白虎之專司何必拘少陽而疑慮寒哉放膽服之勿再因循致貽伊戚也坐中顧聽泉見案卽謂北涯曰孟英腸熱膽堅極堪倚賴如猶不信我輩別無善法也顧友梅許芷卿趙笛樓亦皆謂是疏方以白虎加西洋參貝母花粉黃芩紫苑杏仁

冬○瓜○仁○枇○杷○葉○竹○葉○竹○茹○竹○黃○而○一○劑○甫○投○咽○喉○卽○利○三○服○後○
各○恙○皆○去○糜○粥○漸○安○乃○改○甘○潤○生○津○調○理○而○愈○予○謂○此○案○不○僅○
治○法○可○傳○其○闡○發○病○情○處○識○見○直○超○古○人○之○上○

劉廉方、常州名士也。在西湖受暑移榻於崔仲遷別駕處醫治。
垂危。莊芝階舍人拉孟英往診之。裸臥昏狂。舌黑大渴。溺赤便。
祕。脈數而扎。與犀角地黃湯加減服之。神識已清。略能進粥。次。
日復診。頗知問答。大有生機。仍處甘涼法以贈之。并囑伊格外。
謹慎。而越日莊半霞詣孟英偕往診視。見其目張睛瞪。齒露唇。
焦。氣喘汗出。揚手擲足。而不可救藥矣。眾楚交咻。謂是寒涼藥。

凝閉而然。孟英曰。病之宜涼宜熱。汝輩不知也。脈乃皮裏之事。汝等不見也。吾亦不屑爲之爭辨。惟目瞪唇焦。人所共覩。則其死於何藥。自有定論。遂拂衣出。半霞再三請罪。孟英曰。俗人見何足介懷。是非日後自明。於我心無慊焉。第斯人斯病。皆可惜也。旣而始知有人主熱藥以僨事。豈非命耶。僅二載而仲遷病。孟英聞之曰。殆矣。蓋知其陰虛而受暑溼。恐主藥者未必能悔悟於前車也。後果聞其廣服溫補之劑。以致真陰竭絕而死。覆轍相尋。迷而不醒。可哀也已。

甌鎮孫總戎令郎楚樓。自鎮江來浙。主於石北涯家。途次卽患

寒熱如瘧。脇痛痰嗽。北涯見其面鰲形瘦。頗以爲憂。卽延醫與
診。醫謂秋瘧與疏散方。北涯猶疑其藥不勝病。復邀孟英視之。
曰。陰虧也。勿從瘧治。以葦莖湯加北沙參。熟地。桑葉。丹皮。海石。
旋覆。貝母。枇杷葉爲劑。北涯見用熟地。大爲駭然。孟英曰。君慮
彼藥之不勝病。吾恐此病之不勝藥。贈此肅肺潤燥。滋腎清肝
之法。病必自安。楚樓聞之。歎曰。妙手也。所論深合病情。前在姑
蘇。服疏散藥甚不相安。居停母疑我服王公之藥矣。果數日而
痊。踰旬卽東渡赴甌去。

姚雪蕉孝廉之太夫人年踰花甲。患感兩月。醫皆束手。始延孟

英診之身。已不能轉側。水飲難於下嚥。聲音不出。便溺不通。曰此熱邪逗畱不去。津液剝削殆盡。計其受病之時。正當酷暑。豈卽溫補是投。但知其虛而不知其病耶。閱前服諸方。惟初手顧聽泉從吸。受暑邪輕清。開上立治。爲合法耳。餘方非不是。起死回生之藥。其如與病無涉何。而阮某小柴胡方。服之最多。蓋醫者執此和解之法。謂不犯汗吐下三者之險。豈不穩當。病家見其參胡竝用。謂補正祛邪。具一舉兩全之美。最爲上策。孰知和解足少陽傳經傷寒之劑。不可以概和各經各氣之各病。徒使參胡提升熱邪以上逆。致一身之治節。無以清肅下行。而薑棗

溫臑涇濁於中焦。致運化之樞機。失其灌溉之布。氣機愈窒。津液愈乾。和解之湯愈進。而氣愈不和。病愈不解。今則雖有良治。而咽喉僅容點滴。氣結津枯。至於此極。英雄無用武之地矣。雪蕉昆季力懇挽救。乃疏甘涼濡潤之方。囑其不限時刻。不計多寡。頻以水匙挑入。使其漸滲下喉。而一日之間。僅灌一小杯許。其病勢之危。於此可想。直灌至旬餘。氣機始漸流行。藥可服小半劑矣。人見轉機之難。不無議論。旁生賴孟英靜鎮不搖。乃得日以向愈粥食遞加。惟大解久不行。或以爲憂。孟英曰。無恐也。水到渠成。穀食安而津液充。則自解矣。若欲速妄攻。則久不納。

穀之胃。尙有何物。以供其蕩滌哉。至九月下旬。始有欲解之勢。孟英連與補氣益血之藥。尙不能下。於前方加蜣螂一對。熱服。卽解。凡不更衣者。計及五十日矣。聞者莫不驚異。繼以平補善後而痊。

仲冬大雪連朝。積厚丈許。嚴寒久凍。西湖可行車馬。斯時也。盛少雲患痰嗽。夜熱自汗。不寐。左脇痛如鍼刺。肌削不饑。自問不起矣。請孟英託以後事。及診其脈。許以可生。蓋病來雖惡。未經誤藥也。與固本加龜板鼈甲。莖蓉。知藥。青黛。石斛。花粉。白芍。棟實。海石。旋覆。貝母。蛤殼。牛膝。出入爲大劑。投之。卽效。連服四五

十帖而痊。予謂斯證患於斯時。若經別手。未有不投溫補者。而少雲能與孟英遊。其亦具眼之人乎。此真所謂患難交。不可不留心於平日也。然亦不能人人而遇之。殆佛氏所謂有緣存乎其閒歟。

壬寅春。邵小墀室患汛。愆釋醫診。以爲妊。廣服保胎藥。漸至腹脹。跗腫。氣逆。礙臥。飲食不進。入夏。延孟英視之。曰。血虛氣滯。誤補成脹也。先以黃連厚樸山查先服其湯以治其亦一安之法雞內金。橘皮。大腹皮。枳實。茯苓。梔子。棟實。杏仁。紫苑。旋覆等藥。少佐參朮服之。氣機漸運。脹去。食安。漸入滋陰養血之治。數月經行而愈。

扶脾抑肝製方
靈動

凡心腎不交之
人多不能仰臥
以仰則腎氣不
能上承而心氣
愈浮也

一人患晨泄有年累治不效而春閒尤甚孟英按其脈曰汝雖
苦瀉而瀉後腹中反覺舒暢乎曰誠然苟不泄瀉又脹悶減食
矣而服四神附桂之藥其瀉必加此曷故也曰此非溫升補澀
之證乃肝強脾弱木土相凌處一方令其常服數帖即安後竟
無此恙矣方用白朮苡仁黃連棟實桂枝茯苓木瓜芍藥蒺藜
橘皮而已

邵魚竹給諫起居食飲如常惟僅能側臥略難仰睡仰而寤無
恙也稍一合眼則驚竄而醒雖再側眠亦徹夜不得寐矣多年
莫能治孟英以三才合枕中丹加黃連肉桂服之良效其長郎

心腎交而治之以黃連肉桂合之其用甚巧

不寒不燥真陰
虛血流者之良
劑

子旒久患痰多胸膈滿悶連年發熱藥之罔效孟英脈之曰氣
分偏虛痰飲阻其清陽之旋運宜法天之健以爲方則大氣自
彊而流行不息胸次乃廓然如太空矣與六君去甘草加黃耆
桂枝薤白婁仁石菖蒲蒺藜旋覆服之滿悶漸舒癰亦不發矣
予荆人婉後惡露不行或勸服生化湯適孟英枉顧診曰陰虛
內熱天令炎蒸雖赤沙糖不可服也以生地丹參丹皮豆卷菟
蔚子茯苓桃仁山查卮子澤蘭琥珀投之卽效且無別恙而易
健可見體質不齊藥難概用况其致病之因不一病機傳變無
窮語云量體裁衣而治病者可不辨證而施治耶孟英常曰凡

通人之論無論
寒熱藥用不
得當皆是誤人
不可不知

產後世俗多尙生化湯。是以一定之死方。療萬人之活病體。寒者固爲妙法。若血熱之人。或兼感溫熱之氣者。而一概投之。驟則變證蜂起。緩則蓐損漸成。人但知產後之常有。而不知半由生化湯之厲階。此風最盛於越。方本傳於越之錢氏。自景岳采入八陣。遂致流播四海。人之陰受其害者。數百年矣。從無一人能議其非。今特爲此長夜之燈。冀後人不致永遠冥行。或可稍補於世。但景岳最偏於溫補。而獨於產後一門。力辨丹溪大補氣血爲主之非。可謂此老之一隙微明。惜猶泥於產後宜溫之謬說。蓋由未入仲聖之宮牆也。

戚媼者年六十餘矣。自幼傭食於黃蓮泉家。忠勤敏幹。老而彌甚。主僕之誼。勝於親戚也。秋閒患霍亂。轉筋。孟英視之。暑也。投自製蠶矢湯兩服而安。三日後忽然倦臥。不能反側。氣少。不能語言。不飲不食。蓮泉惶懼。不暇遠致。孟英卽邀濟仁堂朱某診之。以爲霍亂皆屬於寒。且昏沈欲脫。疏附子理中湯與焉。蓮泉知藥猛烈。不敢遽投。商之王安伯。安伯云。以予度之。且勿服也。若謂寒證。則前日之藥下嘔卽斃。吐瀉安能漸止乎。蓮泉聞之大悟。著人飛趕孟英至。而切其脈曰。此高年之體。元氣隨瀉而泄。固當補者。第餘暑未清。熱藥在所禁耳。若在孟浪之家。必以

前之涼藥爲未當。今日溫補爲極。是縱下咽不及救。亦惟歸罪於前手寒涼之誤也。設初起卽誤死於溫補。而世人亦但知霍亂轉筋是危險之證。從無一人能知此證有陰陽之異。治法有寒熱之殊。而一正其得失者。此病之所以不易治。而醫之所以不可爲也。今君見蓋附而生疑。安伯察病機之已轉。好問者心虛識機者智贍。二美相濟。遂使病者跳出鬼門。關醫者卽脫無妄罪。幸矣。幸矣。乃以高麗參麥冬知母萎蕤木瓜扁豆石斛白芍苡仁茯苓蒺藜爲方。服六劑。始能言動。漸進飲食。調理月餘而健。

可見浙人稟賦之薄若幽冀之人即誤服青麟丸數錢亦不至如斯之甚也

七月十八日夜予患霍亂轉筋甚劇倉卒閒誤服青麟丸錢許比曉急邀孟英診之脈微弱如無耳聾目陷汗出肢冷音啞肌削危象畢呈藥恐遲滯因囑家慈先濃煎高麗參湯亟爲接續隨以參朮白芍茯苓附桂乾薑木瓜苡仁扁豆蓮實爲方一劑而各證皆減次日復診孟英曰氣分偏虛那堪吐瀉之泄奪誤飢苦寒微陽欲絕昨與真武理中合法脾腎之陽復辟矣剛猛之品可以撤去蓋吐瀉甚而津液傷筋失其養則爲之轉薛生白比之痙病例可推也凡治轉筋最要顧其津液若陽既回而再投剛烈則津液不能復而內風動矣此治寒霍亂之用附桂

雖○中○病○而○服○之○不○止○反○受○其○害○矣○喻○氏○論○中○寒○證○亦○具○此○意○

亦○貴○有○權○衡○而○不○可○漫○無○節○制○致○墮○前○功○也○即○於○前○方○裁○去○薑○附○肉○桂○加○黃○耆○石○斛○服○至○旬○日○而○愈○予○謂○此○番○之○病○危○同○朝○露○若○非○孟○英○恐○不○能○救○常○聞○張○柳○吟○云○但○使○病○者○聽○孟○英○論○病○之○無○微○不○入○用○藥○之○無○處○不○到○源○源○本○本○信○筆○成○章○已○覺○疾○瘳○過○半○古○云○檄○愈○頭○風○良○有○以○也○

陳○藝○圃○亦○知○醫○其○室○人○於○仲○秋○患○霍○亂○轉○筋○自○診○以○爲○寒○也○投○熱○劑○勢○益○甚○延○朱○茂○才○視○之○亦○同○乎○主○人○之○見○也○病○尤○劇○始○請○孟○英○決○之○曰○寒○爲○外○束○之○新○邪○熱○是○內○伏○之○真○病○口○苦○而○渴○薑○附○不○可○投○矣○與○河○閒○法○人○皆○不○之○信○也○再○與○他○醫○商○之○仍○投○熱○

此必別有外證
可憑故直斷爲
暑與痰溼未有
專視脈之訛與
歇至而如是定
斷者讀者勿被
瞞過

藥○乃至口鼻出血而死○極其悔歎○始服孟英之卓見○予謂霍亂
一證○近來時有而醫皆不甚識得清楚○死於誤治者極多○孟英
特著專論○雖急就成章○而辨晰簡當○略無支漏○實今日醫家首
要之書○以其切於時用○不可不亟爲熟讀而研究也○

顧○雲○垞○體○豐○年○邁○患○瘧○於○秋○脈○亢○而○稍○有○歇○止○孟○英○曰○亢○者○暑○
也○歇○止○者○痰○溼○阻○氣○機○之○流○行○也○大○忌○溫○補○以○助○邪○氣○及○與○清○
解○蠲○痰○之○法○病○不○少○減○而○大○便○帶○血○孟○英○曰○暑○溼○無○形○之○氣○而○
平○素○多○痰○邪○反○得○以○盤○踞○頗○似○有○形○之○病○清○解○不○克○勝○其○任○氣○
血○皆○受○其○滋○擾○必○攻○去○其○痰○使○邪○無○依○附○而○病○自○去○切○勿○以○高○

此方可謂峻極
良由識高非徒
膽大

用補亦要用得
其宜方能奏效
非一味變補即
能愈疾也案中
諸治可以爲法

年而畏峻藥。伊姪桂生少府亦精於醫者也。聞之極口稱是。遂以桃仁承氣湯加西洋參滑石芩連橘紅貝母石斛爲方。送礞石滾痰丸。乃郎石甫孝廉云。此藥在他人必畏而不敢服。我昔年曾患暑溼證。深悉溫補之不可輕試。况高明所見相同。更何疑乎。徑服二劑。下粘痰汚血甚多。瘡卽不作。仍以清潤法善後而康。

邵子受令壺患吐血肌膚枯澀口渴脈虛大。孟英曰。氣分之陰虧也。溫補旣非滋填。亦謬以參耆。二冬知母百合麥蘗石斛桑葉枇杷葉投之而愈。

九月間張春橋患瘧寒少熱多閒二日而作甫兩發形卽清瘦。孟英診曰脈絃而細尺中甚數疾作於子夜口乾嗜飲乃足少陰熱瘧也兩發遽爾形消胡可玩視吾以妙藥奉贈可期卽已但請卽服不可商於人而致生疑議也方用元參生地知母丹皮地骨皮天冬龜板茯苓石斛桑葉春橋以向所心折遂服之一劑瘧卽止再以滋陰善後而愈予謂此證一帖而瘳似乎輕易但非真才實學焉有此種妙治設遇別手非溫補卽提表其禍可勝道哉然天下之病無論輕重總貴初治得法何致輕者重而重者危耶奈世俗之情必使輕者重而後轉安始知醫藥

之功殊可歎也。按此證世人但知其爲三陰瘧。籠統治以溫補之法。從未聞有分經用藥者。今提出少陰二字。創立清涼之劑。用藥精當。取效敏捷。法似新奇。理自完足。所謂活人治活病。全以活潑運之也。可以啟人慧悟。垂作典型。

金寬甫初冬患感。局醫黃某聞其向來不拘何病。總須溫藥。而痊胸懷成見。進以薑桂之方。漸至足冷面赤。譫語煩躁。疑爲戴陽而束手矣。舉家徬徨。延孟英診焉。曰此伏邪晚發。誤與升提。熱浮於上。清解可安。寬甫猶以向不服涼藥爲疑。方中苓連之類。堅不肯用。乃兄愿谷中翰極力開導。督人煎而飲之。果得霍

然。

周曉滄乃郎品方患冬溫。所親顧聽泉知其體屬陰虧。病非風寒也。不犯一分溫升之品。而證不能減。勢頗可危。乃虛懷轉邀孟英診之。曰。所治良是也。但於方中加貝母杏仁紫苑冬瓜子等味。與之遂效。可見藥貴對病。雖平淡之品。亦有奇功。孟英嘗云。重病有輕取之法。於此可見。

癸卯春邵秋子令堂年近六旬。患寒熱如瘧者久矣。諸醫雜治罔效。孟英視之。曰。此溼邪久蘊。已從熱化。誤投提補。動其肝陽。痰飲因而上逆。與通降之法。寒熱即減。而包某謂瘧久陰虛。理

宜滋養病家聞之近是遂進首烏鼈甲等藥漸至脈伏胸痞呃
忒自汗渴飲不食顴赤便泄包某束手疏生脈散以塞責舉家
徬徨再求孟英診之曰此滋膩阻塞氣機清陽不司旋運痰飲
閉滯隧絡非脫象也補藥不可進以栝婁薤白合小陷胸加菖
蒲竹茹旋覆貝母杏仁紫苑枇杷葉投之呃止脈出大有轉機
而鄭某謂病固屬痰須溫熱以宣通勿寒涼而凝遏病家又惑
焉薑桂頻投既而脣腫咽疼不能進飲舌乾短硬難出語言復
請孟英救療與犀角地黃湯加元參知母銀花竹黃花粉膽星
石菖蒲竹瀝之類六七劑吐出極臭膠痰甚多粥飲漸進此第

痘原感疫而發
醫林改錯中言
之甚詳

三次生機也。奈狂瀾莫障。邪說橫行。輒以涼藥不宜擅服。久病
必定元虛。甘言悅耳。遂至升散溫補。各逞所能。符咒乩方。罔不
徧試。延至仲夏。腠腐齧糜。脣高數寸。竟成燎原。莫救。仍懇孟英
設法。乃堅辭不能措手。付局醫黃某敷治。腫爛日甚而終。

上年秋燥冬暖。略無霜雪。河井竝涸。吾杭自九月閒起。天花流
行。十不救五。小兒之殤於是者。日以百計。孟英曰。此痘疫也。治
法當與常痘有異。惜幼科未之察耳。且天令發泄。不主閉藏。入
春恐多喉患。特刊加味三豆飲方。俾未曾佈痘者。預服免患。將
出者。恣飲冀輕。又勸人頻服青龍白虎湯。以杜春來喉恙。不料

其言果應。三春不雨。喉疹甚多。醫者猶不悟其致病之因。僅知發散。正如火上添油。孟英胸有成竹。一以仲聖白虎湯爲救焚主劑。若已及於營分者。用晉三犀角地黃湯。相機加減。又刊青龍白虎湯暨錫類散方。廣爲印送。賴此以活者。不可勝數。

附 加味三豆飲

生○綠○豆○

生○黃○豆○

生○黑○大○豆○

或用生白扁豆亦可

生○甘○草○

金○銀○花○

水煎服

孟英原刻自注云。古方三豆飲。爲痘證始終可服之妙藥。未出時常服。痘可使稀。將出時急服。重可冀輕。已出

時忒服。逆可轉順。盡出時頻服。毒可易清。俗傳種痘是
密室烘花。更有初生小兒。於十八日內服藥。令其出痘
之法。是握苗助長。此等矯揉造作。陰受其害者。古今來
不知幾恒河沙數矣。至於種種稀痘之方。皆無義意。或
以毒藥損人元氣。或以穢物致生別恙。慎勿爲其所惑。
惟此方藥極簡易。性最平和。味不惡劣。易辦易服。不必
論其體質。久服無弊。誠盡善盡美之王道藥也。杭人惑
於患痘不食豆之說。甚屬可鄙。今特辨明。冀人醒悟。凡
小兒能啜飲後。卽以此藥日日代茶。誠保赤之首章焉。

原方用赤豆。性燥傷陰。予以黑大豆易之。更有補陰之
績。雖燥令燥。體皆無礙矣。再益銀花甘草。而化毒之功
尤勝。或疑銀花性涼。似難久用。不知三豆皆穀也。性能
實脾。得銀花以濟之。更覺沖和。况小兒體稟純陽。極宜
此甘涼補陰之味。豈特稀痘。尤能明目消疳。不生瘡癰
泄瀉等病。其功未能殫述也。

附 青龍白虎湯

橄欖 生蘆薈

水煎服

孟英自注云。此予自制方也。橄欖色青。清足厥陰內寄。

之○火○風○而○靖○其○上○騰○之○燄○蘆○菰○色○白○化○手○太○陰○外○來○之○
燥○熱○而○肅○其○下○行○之○氣○合○而○爲○劑○消○經○絡○留○滯○之○痰○解○
膏○梁○魚○麵○之○毒○用○以○代○茶○則○龍○馴○虎○伏○藏○府○清○和○豈○但○
喉○病○之○可○免○耶○且○二○味○處○處○皆○有○人○人○可○服○物○異○功○優○
久○任○無○弊○實○能○弭○未○形○之○患○勿○以○平○淡○而○忽○諸○

附 錫類散

象牙屑

焙

眞珠

各二分

飛淨青黛

六分

梅花冰片

三釐

壁錢

二十個俗名喜見窠木板上者勿用

西牛黃

人指甲

各五釐男病用女女病用男合送濟人須分別配之

共研極細粉吹患處流出惡涎即愈○孟英自注云此專治爛喉痧疹之神方也尤鶴年附載於金匱翼云張瑞符傳此方以救人而得子故子名之曰錫類散

段春木之室爛喉○內外科治之束手○姚雪蕉孝廉薦孟英視之○骨瘦如柴○肌熱如烙○靱痰阻於咽喉○不能咯吐○須以紙帛攪而曳之○患處紅腫白腐○齦舌皆糜○米飲不沾○汛事非期而至○按其脈左細數右絃滑○曰此陰虧之體○伏火之病○失於清降○擾及於營○先以犀角地黄湯清營分而調妄行之血○續與白虎湯加西洋參等肅氣道而瀉燎原之火○外用錫類散掃痰腐而消惡毒○

種痘之法以人巧而毒天工原為妙法但須慎於擇時若疫氣流行之時感其氣者倘有腫爛喉之證况又加以痘毒耶此乃醫之不明未可盡歸咎於種痘也

繼投甘潤藥蠲餘熱而充津液日以向安月餘而起

吳雨峯明府家囑兒科為其仲郎所出之兩孫種痘下苗二三

日發熱咽疼醫以為痘之將形也投以升透之藥赤斑似錦喉

爛如焚半月之間闔家傳染諸醫莫敢入其室孟英往診時見

其三郎耕有四郎小峯尙未病亟曰已病者固當圖治未病者

尤宜防患傳以青龍白虎湯代茶恣飲竟得無恙其令閭洪宜

人及仲媳皆為之治愈此外如其長媳其令媛其三孫其僕其

探病之女戚殞於是病者七人焉時雨峯築巖兩喬梓咸宦於

外仲郎亦幕遊江右不料因種痘而釀此家禍益信孟英勸人

勿種痘之說爲可訓矣。

潘洪疇託兒醫爲其仲郎春波所出之孫種痘。下苗三日卽咽

喉痛而復升之卽非種出之痘亦不

痛。醫與升散藥發熱斑爛七朝而天春波及其弟祥衍皆染其

病。春波之證顧聽泉治而愈矣。祥衍之恙咽喉爛至於舌胸膈

痞塞不通。牙關緊。瀉小溲淋痛。口流紫黑血塊。人皆謂其臟腑

爛焉。孟英視之曰。惡血毒涎正欲其出。吹以錫類散。用碗承其

口。流出涎血甚多。咽喉牙環胸膈皆得漸舒。投以犀角地黃湯。

加元參銀花童溺藕汁竹黃花粉貝母石菖蒲之類。漸以向安。

繼與生津填補而痊。

夏閒顧聽泉邀孟英視其所親屠綠堂之恙。孟英曰：陰生可慮。果於夏至前五日而卒。屠之五令郎患痰嗽者數年。近因悲哀病作。徐某見其嗽甚則吐也。投以參朮之劑。病益甚。閏七月十七夜。綠堂忽示夢云：汝病須延孟英診視。服溫養藥可愈。覺而異之。卽迂過診。孟英曰：此陰虛勞嗽。嗽久而衝氣不納。則嘔吐非胃寒也。經言勞者溫之。亦溫養之謂。非可以溫補施之者。病者見案。更爲驚歎。始以父夢告焉。孟英亦爲之肅然。方用西洋參熟地。茯苓二冬。茯苓坎版。牡蠣。紫石英。萎蕤。枇杷葉。橘皮。服之。果安。予謂凡事皆可以感天地格神鬼。况醫爲性命之學耶。

卽此一案。可以知孟英之手眼通天。非幸獲虛名者所能仰望也。

胡秋初於酷熱時。偶有不適。醫以柴葛香薷散之。反惡寒。胸痞。更醫用枳朴枳榔以瀉之。勢日劇。延孟英視之。自汗不收。肢背極冷。奄奄一息。脈微無神。曰。稟賦素虧。陽氣欲脫。此必誤認表證。使然。與救逆湯加參耆服之。漸安。繼以補氣生津調理。匝月而痊。

陳菱裳患淋久不愈。延至溽暑。邀孟英診之。曰。易事耳。與補中益氣湯而愈。其子荷官病痞積腹脹發熱乾噎。善食黃瘦便溏。

合觀二案其人
必陰虛肺燥之
質故用藥如此

湯赤兒科藥廣服無功已將絕望矣孟英聞而憐之曰吾於幼
科雖未討論姑贈一方或有生機也以黃連白芍牡蠣龜甲雞
肫皮五穀虫霞天麴木瓜山查棟實橘皮桔梗旋覆厄子丹皮
等藥投之一劑知旬餘愈

段堯卿之太夫人患霍亂轉筋年踰七十矣孟英投自制連橫
飲三啜而瘳霍亂案甚夥不遑廣采姑錄數則以示一斑

石誦義室久患痰嗽諸醫藥之勿廖孟英切其脈曰非傷風也
與北沙參熟地百合麥冬貝母紫苑萎蕤枇杷葉鹽水炒橘皮
燕窩一劑知數劑已初秋又患脘痛上及肩尖向以爲肝氣觀

服破削之品。孟英曰：亦非也。以砂仁炒熟，地炙，橘紅、棟實、延胡、枸杞、當歸、茯苓、桑甚、蒺藜爲方服之，良效。繼卽受孕矣。

石芷卿患感。張某連投柴葛藥，熱果漸退，而復熱之後，勢更孔甚。乃延孟英診焉。先以梔豉、芩連等藥清解其升浮之熱，俟邪歸於府脈，來絃滑而實，徑用承氣湯下之。時其尊人北涯赴甌，無人敢主其可服否也。另招他醫決之，以爲太峻。且腹不堅滿，妄攻慮變。舉家聞之，搖惑。暮夜復懇再診。孟英辨論洋洋，堅主前議。服後果下黑矢。次日大熱、大汗、大渴，引飲。孟英曰：此府垢行而經熱始顯，與竹葉石膏湯二劑而安。繼以育陰充液調理。

而康。

朱某患痢於越。表散蕩滌滋膩等藥。備嘗之矣。勢瀕於危。始返杭。乞孟英診之。神氣昏沈。耳聾。腕悶。口乾。身熱。環臍硬痛。異常。晝夜下五色者數十行。小溲清痛。四肢抽搐。時時暈厥。曰。此暑溼之邪。失於清解。表散蕩滌。正氣傷殘。而邪乃傳入厥陰。再以滋膩之品。補而錮之。遂成牢不可拔之勢。正虛邪實。危險極矣。與白頭翁湯。加棟實。茯苓。連梔。芍銀花。石斛。桑葉。橘葉。羚羊。角。牡蠣。海蛇。鼈甲。鷄內金等藥。大劑頻灌。一帖而抽搐減半。四帖而抽搐始息。旬日後便色始正。溲漸清長。粥食漸進。半月後

臍間之硬始得盡消改用養陰調理踰月而康

鄰人汪氏婦之父王叟仲秋患痰嗽不食氣喘不臥囊縮便秘心搖搖不能把握勢極可危伊女浼家慈招孟英救之曰根蒂欲脫耳非病也以八味地黃湯去丹澤合生脈加紫石英青鉛龍牡胡桃肉棟實菴蓉投之大解行而諸恙減乃去菴蓉麥冬服旬日以參初冬邵可亭患痰嗽面浮微喘醫謂年踰花甲總屬下部虛寒進以溫補納氣之藥喘嗽日甚口涎自流莖囊漸腫兩腿腫硬至踵不能稍立開口則喘逆欲死不敢發言頭仰則咳嗆咽疼不容略臥痰色黃濃帶血小溲微黃而長許芷卿

薦孟英視之脈形絃滑有力曰此高年孤陽熾於內時令燥火
薄其外外病或可圖治真陰未必能復且平昔便如羊矢津液
素乾再投溫補如火益熱矣乃以白虎湯合瀉白散加西洋參
貝母花粉黃芩大劑投之并用北梨搗汁頻飲潤喉以緩其上
僭之火數帖後勢漸減改投葦莖湯合清燥救肺湯加海蛇蛤
壳青黛勃臍竹瀝爲方此却下必以病者難服也何不另用之日外梨已用及百斤而喘始息繼加
坎版鼈甲犀角而以豬肉湯代水煎藥大滋其陰而潛其陽火
始下行小溲赤如蘇木汁而諸證悉平下部之腫隨病遞消一
月已來共用梨二百餘斤矣適大雪祁寒更衣時略感冷風腹

中微痛。自啜薑糖湯兩碗。而喘嗽復作。口乾咽痛。大渴舌破。仍不能眠。復用前方。以綠豆煎清湯代水煮藥。始漸向安。孟英謂其乃郎步梅曰。內經云。陰精所奉。其人壽。今尊翁陰液久虧。陽氣獨治病。雖去矣。陰精非藥石所能繼續。况年踰六秩。長不勝消。治病已竭人謀。引年且希天眷。予以脈察之。終屬可虞。母謂治法不周。贈言不早。致有他日之疑成敗之論也。

一賣酒人姓陸。極窘而又遭顛沛。久而患一異疾。形消善癢。蠱從皮膚而出。搔之蠕蠕。醫治莫效。孟英診曰。悲哀勞苦。陽氣受傷。麴蘖浸淫。乃從虫化。與補氣藥加杉木桑枝而愈。
亦○濕○熱○生○虫○之○治○法○

陳芟裳之太夫人。陡患嘔吐。徹夜不止。次早延孟英診之。自述因寒而致。孟英知芟裳進場家無主藥之人。若明言屬熱。必致畏藥不服矣。漫應曰。固寒也。而疏方則芩連梔棟。以大苦寒爲劑。投之良愈。

張鄭封室。晚後卽發熱。服生化湯二帖。熱益熾。而發赤疹。顧聽泉診之。卽與清解。三劑不應。欲進犀角地黃湯。而恐病家之狃於產後以生疑也。乃拉孟英質之。診其脈絰滑而數。面赤熱躁。胸悶善悲。肢腫而疼。兩肘白疱如扁豆大者數十顆。舌上亦有一顆痛礙水飲。大便不解已旬日矣。曰。此不但胎前伏暑。且有

蘊毒而誤服生化湯以助其虐。幸初手卽用清解。尙不致於昏陷。犀角地黃極是治法。猶恐不能勝任。乃與聽泉商加西洋參滑石知母銀花花粉人中白。婁仁竹黃貝母桑葉。卮子爲劑。其所親曰。高明斷爲熱證。何以病者雖渴而喜熱飲耶。孟英曰。此方中所以多用痰藥也。凡胸中有熱痰阻礙氣機者。每如是不可以其向不吐痰而疑吾言之妄也。若因此而指爲寒證。則禍不旋踵矣。進四帖始得大解。頻吐稠痰。而各恙皆減。飲食漸加。孟英曰。病勢雖穩。餘熱尙熾。苟不亟爲清滌。而遽投補益。猶有葦損之虞。其母家果疑藥過寒涼。必欲招專科調治。幸將前方

示彼。尙不妄施溫補。然隔鞞搔癢。紀律全無。旬日後。餘火復燃。鄭封堅懇孟英設法。仍用甘寒療之。周身膚蛻如蛇皮。爪甲更新。其病之再生也。可知。繼與滋補真陰而起。

葉晝三患。欬逆上氣。頭偏左痛。口渴不饑。便瀉如水。王瘦石薦孟英視之。曰。此肝陰胃汁交虛時。令燥邪外薄。與育陰息風。清燥滋液之法。日以漸安服。及兩月大解。反形乾結而痊。

鄭某吐血盈碗。孟英脈之。右關洪滑。自汗口渴。稍一動搖。血卽上溢。人皆慮其脫。意欲補之。孟英曰。如脫惟我是問。與白虎湯加西洋參大黃炭一劑。霍然。

季秋顧聽泉邀孟英視康侯副轉之恙切其脈滑數而右歇左促且肝部閒有雀啄氣口又兼解索望其面宛如薰黃頭汗自出呼吸粗促似不接續坐臥無須臾之寧便溺澀滯渾赤極臭心下堅硬拒按形若覆碗觀其舌色邊紫苔黃殊不甚乾燥問其所苦曰口渴甜膩不欲飲食苟一合眼卽氣升欲喘煩躁不能自持胸中懊懣莫可言狀孟英曰此由溼熱誤補漫無出路充斥三焦氣機爲其阻塞而不流行蔓延日久津液爲之凝滯而成痰飲不啻人禽雜處苗莠同疇邪正混爲一家醫見肢冷自汗不知病由壅閉而然欲以培正而邪氣方張得補反爲

樹○幟○豈○非○資○寇○兵○而○齎○盜○糧○哉○非○其○類○者○鋤○而○去○之○乃○爲○喫○緊○
之○治○聽○泉○曰○良○是○也○夏○閒○起○病○聞○自○心○悸○少○寐○楊○某○以○爲○虛○而○
補○之○時○尙○出○差○辦○事○暑○溼○外○侵○受○而○不○覺○迨○聞○差○未○竣○其○病○斯○
發○而○諸○醫○之○藥○總○不○外○乎○溫○補○一○途○以○致○愈○補○愈○劇○今○擬○溫○膽○
法○待○君○可○否○孟○英○曰○脈○證○多○怪○皆○屬○於○痰○今○胸○痞○如○斯○略○無○痰○
吐○蓋○由○痰○能○阻○氣○氣○不○能○運○痰○耳○宜○於○溫○膽○中○加○薤○白○婁○仁○通○
其○胸○中○之○陽○又○合○小○陷○胸○爲○治○飲○痞○之○聖○法○參○以○梔○鼓○泄○其○久○
鬱○之○熱○以○除○懊○懷○佐○以○蘭○草○滌○其○陳○腐○之○氣○而○醒○脾○胃○聽○泉○深○
然○之○連○投○二○劑○各○恙○皆○減○脈○亦○略○和○而○病○者○以○爲○旣○係○實○證○何○

妨一瀉而去之。連服大黃丸二次。承氣湯半帖。孟英急止之。曰。畏虛進補。固非。欲速妄攻。亦謬。蓋溼蒸爲熱。灼液成痰。病非一朝一夕而成。治以上下分消爲是。不比熱邪傳府。可一瀉而愈也。越日下部果漸腫。孟英曰。攻痞太速之戒。古人不我欺也。與聽泉商以前法。加黃芩。合瀉心意。再配雪羹投之。痰果漸吐。痞亦日消。而自腹至足。以及莖囊腫勢。日加。孟英謂勢已如此。難以遽消。但從三焦設法。則自上而下。病必無虞。與聽泉商用河閒桂苓甘露飲意。而姚平泉孝廉力主崇土勝溼之法。深以寒涼爲不可用。眾議仍投前日之藥。孟英曰。前藥原可服也。嫌力

不足耳。次日痰中帶血甚多。孟英曰：浮熱薰蒸不已，自氣及營矣。與聽泉暨王子能參軍商，以知藥生地、犀角、鼈甲、白芍、苡仁、貝母、石斛、茅根、麥冬、滑石、卮子、藕汁，童溺投之而止。踰數日又吐，且肢冷自汗，心餒畏脫。姚平泉謂氣不攝血，當主歸脾湯以統之。舉家皇皇，連請診脈者三次。孟英曰：脈來屢變，陳芝江所以不能指實其病。而楊阮諸人皆疑爲大虛之候也。然望聞問切，不可獨憑於指下。今溲如赭，石湯渾赤，有腳，其爲溼熱之病昭昭若揭。初傷於氣，分則津液受灼，以爲痰漸及於營，分則陰血不安而妄溢。邪氣內盛，豈非病實而真實類虛？吾不受病之

前云不可妄攻
此又投峻下之
劑何也蓋前徒
攻其熱故不中
病而致生他證
此則直攻其痰
始能與病相償
也

欺也。堅守前議。靜鎮不搖。服二劑。果止。孟英曰。血之復吐也。由
於氣分之邪。以擾及也。欲清氣道之邪。必先去其邪所依附之
痰。蓋津液既爲邪熱灼燥。以成痰。而痰反卽爲邪熱之山險也。
不妨峻攻其實。而緩行其勢。初進滾痰丸三錢。得下泄氣一次。
副轉云。四十日來。未有之通暢也。連投數日。始解膠痰黑矢。多
遍而小。洩亦漸清。長苔色亦退。寢食遂安。惟下部之腫。猶爾也。
馬香崖。陸虛舟。皆主實脾行水之法。孟英曰。諦參脈證。病不在
脾。况善饑便燥。口渴溺多。吾方慮轉消證。亟投甘潤之不遑。惡
可滲利傷陰。補土劫液耶。且脾虛下陷之腫。與溼盛而腫之腫。

其○膝○之○上○下○內○外○形○勢○必○然○相○貫○今○膝○之○上○下○內○外○凹○凸○迴○判○毫○不○毗○連○蓋○由○溼○熱○所○釀○之○痰○飲○既○誤○補○而○痞○塞○中○焦○復○妄○攻○以○流○竄○隧○絡○所○謂○不○能○一○蕩○而○蠲○勢○必○旁○趨○四○射○吾○當○以○法○取○之○會○又○咳○痰○帶○血○而○精○神○食○飲○如○常○孟○英○曰○無○恐○也○此○乃○前○次○嚼○三○七○太○多○兜○澀○留○瘀○最○不○宜○用○吐○而○去○之○極○妙○但○須○金○水○同○治○冀○咳○止○而○血○絡○不○震○動○爲○要○耳○與○甘○露○飲○加○藕○汁○童○溺○服○之○四○劑○而○止○咳○嗽○亦○寧○於○是○專○治○其○下○部○之○腫○以○固○本○加○知○藥○貝○母○花○粉○旋○復○橘○絡○絲○瓜○絡○羚羊○角○棟○實○慈○鬚○豆○卷○薏○苡○竹○瀝○出○入○爲○劑○二○三○帖○閒○其○高○突○隆○腫○之○處○卽○覺○甚○癢○搔○之○水○出○如○汗○

而○作○慈○氣○六○七○日○後○兩○腿○反○覺○乾○瘦○燥○痛○莖○囊○亦○隨○之○而○消○矣○
孟○英○曰○用○此○潤○藥○消○腫○尚○且○乾○痛○咽○燥○設○從○他○議○而○投○燥○脾○利○
水○之○法○更○當○何○如○哉○蓋○寒○溼○則○傷○陽○熱○溼○則○傷○陰○血○液○皆○陰○也○
善○後○之○法○還○宜○滋○養○血○液○稍○佐○竹○瀝○以○搜○絡○中○未○淨○之○痰○使○愈○
後○不○爲○他○日○之○患○更○屬○法○中○之○法○服○之○飲○食○中○節○便○溺○有○權○幸○
無○消○渴○之○虞○而○竟○愈○焉○

廣○孔○愚○司○馬○久○患○溇○泄○而○舌○黑○氣○短○自○春○徂○冬○治○而○不○效○孟○英○
視○之○曰○勞○心○太○過○陽○燥○其○陰○人○見○其○溇○泄○輒○與○溫○中○不○知○肺○受○
火○刑○氣○失○清○肅○而○短○促○於○上○則○水○源○不○生○自○然○溺○少○便○瀉○矣○投○

以肅肺清心涼肝滋腎之法果得漸瘳。

周菊生令正患少腹痠墜小洩頻數而疼醫投通利不效繼以升提溫補諸法備試至於不食不寐大解不行口渴不敢飲水聞聲卽生驚悸孟英脈之曰厥陰爲病也不可徒治其太陽先與鹹苦以泄其熱續用甘潤以滋其陰毫不犯通滲之藥而愈。

王氏醫案卷二終

